

tutuki ai tenei take, ma te kaha o te iwi ki te awhina i te tabua orange minita.

TE WHAKAHAERE A RATANA.

Kua tino wehe inaianei te mahi a Ratana a kua tu he hahi hou. Na reira kia ū koutou nga minita i runga ano i nga kupu oati ite takiwa i whakapangia ai koutou. Kia kaha i runga ano ite aroha. Ehara nga Ratana ite hoariri no tatou, engari he tamariki kuare kua kotiti ke. Na reira kia ata hanga koutou, kia kite mai ano ratou he mea hari nui ki o tatou aroaro ina kite ratou i to ratou he, a ka hoki mai ano ki te hahi matua. He maha nga whakaakoranga hē i roto i tenei whakahaere hou, penei me a ratou akoranga hē mo te iriiri, otira ko te hara nui o tenei tikanga hou, ko ta ratou titorehanga ite Tinana o Te Karaiti, ara ite Hahi. Kei te haere mai te wa e kite ai ratou i to ratou hē, e hoki katoa mai ai hoki ki te wahi tika.

TE PIHOPATANGA MAORI.

Ko te kaupapa nui i whakahaerea ai nga tikanga whakatu ite Pihopatanga Maori, ko te ripoata a nga minita Maori ite hui ki Rotorua. Ko etahi kupu i roto i taua ripoata e penei ana te takoto: "*He mea tika kia whakaaturia ki tenei hui te whakaaro o te iwi Maori hei Maori ano te pihopa mo ratou, otira i runga i nga uauatanga e kitea iho ana e matou mo tenei turanga ite timatanga atu nei, kahore o matou whai nui ite whakaaro o te iwi, engari ka whakaae tonu matou ahakoa he Maori he Pakeha ranei taua tangata.*"

Na runga i tenei tangi o taua ripoata i kaha ai te komihana ki te hanga ite pire whakatu ite pihopatanga. Na reira ano hoki i whakapaua ai o matou kaha katoa ki te paahi i taua pire ite Hinota Topu i tu ki Poneke, a he mea tuturu tenei i paahitia taua pire i runga i to matou whakaaro hei pakeha te pihopa tuatahi.

Kati i muri o te paahitanga o te pire, ka hui nga pihopa me nga mangai o te iwi Maori, ki te whiriwhiri i te pihopa tuatahi mo Aotearoa. Na Ngata i whakapuaki mai kia matou te whakaaro kua oti ia ratou, hei Maori te pihopa, kauaka rawa te pakeha. Ki toku whakaaro e tino takahi ana tenei ite ripoata a nga minita ite hui ki Rotorua, koia ra hoki te kaupapa o tenei mea katoa.

Mehemea e kite iho ana ahau tera tetahi minita Maori e taea e ia tenei turanga, maku tonu ia e whakatu. Otira kia mahara koutou, ehara ite mea ka mutu ano nga mahi ma te pihopa nei he kauwhau. he whakapa ranei, engari ka riro mana e whakahaere nga mahi katoa o tona pihopatanga. Ko ahau kei te mohio ki ona hōhonutanga ki ona taumahatanga, a i tenei wa nei kahore he tangata o koutou e taea ai enei mea katoa. Ko taku whakaaro kia riro ia koutou etahi turanga